

09 AUG 1998

Agong-Brunei

PERUTUSAN TAHNIAH PEMASYURAN PENGIRAN MUDA MAHKOTA BRUNEI

KUALA LUMPUR, 9 Ogos (Bernama) -- Yang di-Pertuan Agong Tuanku Ja'afar dan Raja Permaisuri Agong Tuanku Najihah menghantar perutusan tahniah kepada Sultan Hassanal Bolkiah sempena pemasyuran putera baginda Pengiran Muda Haji Al-Muhtadee Billah sebagai Pengiran Muda Mahkota Brunei esok.

Seri Paduka bertitah: "Melalui Paduka Seri Anakanda, Paduka Ayahanda dan Paduka Bonda Raja Permaisuri serta seluruh rakyat Malaysia mengucapkan setinggi-tinggi tahniah kepada Paduka Seri Cucunda di atas pemasyuran sebagai Duli Yang Teramat Mulia Paduka Seri Pengiran Muda Mahkota.

"Semoga dengan berkat doa dan usaha, majlis istiadat pemasyuran tersebut akan berjalan dengan sempurna dan membuka lembaran baru dalam sejarah Negara Brunei Darussalam," titah Seri Paduka.

Perutusan itu dikeluarkan Wisma Putra di sini.

Perdana Menteri Datuk Seri Dr Mahathir Mohamad turut menghantar perutusan kepada Sultan Hassanal Bolkiah.

"Patek dan seluruh rakyat Malaysia dengan penuh hormat dan takzimnya melahirkan rasa syukur dan gembira di atas pemasyuran anakanda Kebawah Duli Tuanku, Yang Teramat Mulia Paduka Seri Duli Pengiran Muda Haji Muhtadee Billah menjadi Duli Yang Teramat Mulia Seri Pengiran Muda Mahkota," kata Dr Mahathir.

Katanya Malaysia sentiasa bersedia untuk bekerjasama dengan Brunei selaras dengan usaha Sultan Hassanal Bolkiah membawa Brunei ke era yang lebih dinamis lagi demi kepentingan kedua-dua negara dan rantau ini.

Pengiran Muda Al-Muhtadee diputerakan pada 17 Feb 1974 di Istana Darul Hana, Bandar Seri Begawan.

Baginda mendapat pendidikan di Maktab Sains Paduka Seri Begawan Sultan. Antara aktiviti yang diminati baginda ialah badminton, sepak takraw dan snuker.

-- BERNAMA

MAM AKD